

## **Deleewar Mbulus a Afisaya.**

Ten labaara.

Mbulus ndən chirethgha deleewar diya a sayiddi nanən ahu porsəna a Roma, asəmha ahu hurarha kumggit mikki a kwasamad nggətta Yeeso. Thlənang na Mbulus deleewar diya a Afisaya də tə numa ndaarha a ngwalang nda karatang nda, nggəra nda thlənanggən fingya də pak fatakkwaya.

'Ya na manggən ahu deleewar diya ndəna kwamana ənana Faara na a wumanggən nafiya na ahu kəshiirha həu a kamu ngyakhrha Yeeso Kərəsti ba, mbə ma fiya kee wa, amma heu tə yibya heu ənana Faara a talara tə hweede.

Deleewar diya fərang də kaali fiya na a tsawa nda ahu kwamana na a kyad ndaarha tsau nda tal yi kəkafek, mbə ahu mee kee wa.

Ahu deleewar diya katəranggən tsə labaara hai aten wum teena, kyaddə kwamana wurna Faara nafiighən, kyadə kəm nggayidghən hu kwaman chakh dimiyid ndan ənang nən kanda, kyang nən kanda sə ahu ngyakhrha dimiyirha kəsər ka mərri Kərəsti Yeeso, tə dəf nən miighən hu tar Səsəna tə Pedənda.

A hu deleewar diya na karapuya sə kyadgha wum ten nafiya Faara tə Kərəsti. Saghang nda nafiya Kərəsti tə fad niifa, Kərəsti kəm ndəna teena. Saghang nda kanda sə tə wuronga, Kərəsti kəm ndəna wutsamnda. Saghang nda kanda sə tə dəf sar kəna na tsauka tə shembe. Ənana Faara əndiya kəsər a tərang ngganda thləmnggən sə.

## **Əngya na ahurghən**

Katəra labara 1:1-2

Tsaurha tə ndan tal hu Kərəsti 1:3-3,21

Kwamana na kyad ndaarha nəghəm tal 4:1-6,20

Mii ngwala labaara 6:21-24

### *Deleewar Mbulus chireethleng nən Afisaya də*

<sup>1</sup> Kyagha deleewar dāba ya a har Mbulus, wurna Faara ka a tsauka təthlənda Yeeso Kərəsti. Niyi a chireethleng nafiya Faara də na chahal a Afisa, nafiya na a dərha mbeedə tə fərkəkafek fa ahu Yeeso Kərəsti.

<sup>2</sup> Ngwa tsauka nggayirha tə tsawud dədemnggirha yi Faara na yinəm China tə Chinəm Yeeso Kərəsti a tsauka tə kun.

### *Parkaya yi Səsəna ahu Kərəsti*

<sup>3</sup> Tsau faala yi Faara tə Chin Chinəm Yeeso Kərəsti. Fərangga parka kəm a talara hai tə kala Səsən parka hu Kərəsti.

<sup>4</sup> Kapa nən əna kəshiirha, nggəm Faara kəm wurdə kəm ahu Kərəsti a tsawum chahal kula ən 'yaara hu yidghən.

<sup>5</sup> Faara 'wadə teena kətəm na a tsawum fa wurayighən tə wumang nda kəm a thləmadghən ba tsawum wanggighən ahu Yeeso Kərəsti. Əndani na midghən ya a ənagha, ka a mbənannggən kaan.

<sup>6</sup> Nənən kee faala ma Faara kəsər ka mamnggit nggayidghən fərang nən kəm təka ahu Wanggən nggəm nən.

<sup>7</sup> Kəsər ka far Kərəsti ndən wal nəm pəla, ndəna, chahang nda dimiyid nəm kəm də. Kəsər ka nggayidghən mulgha hai,

<sup>8</sup> fərang nən kəm hangga heu tə thladwayirha tə sənda.

<sup>9</sup> Nanənya kyadang Faara səndəghən kəm na bəbee aten Kərəsti, 'ya ənanən ka a lədfanggən 'ya na midghən ahu Kərəsti.

<sup>10</sup> A ləghəd sayi, na Faara a əna əngya heu na midghən, na Kərəsti a wumang əngya heu na a talara tə na a hweede nagma a harghən.

<sup>11</sup> Kəsər ka nanəm hu Kərəsti, thlə dəm langaarha a har Faara, kəsər kətəm 'wadə teena wurdə kəm, tsanggən əngya əna nda kəla na midghən ənaarha.

<sup>12</sup> Taama kəm Yahudaya 'wagma shiteena tə Kərəsti tama tsawum fal mamnggitghə nəm.

<sup>13</sup> Nanənya kun mbuwa Yahudaya sək dən labar kəkafek di kəm, labardi na mbənggən yi hərəkrha. A sayiddi fər nun kəkafek tə Kərəsti, fərang Faara Səsəna kun tə Pedənda kəla dəf nən miighən kətəm, tsaudə kəla ənsakhrha na kyat ndarha kun yighən ni.

<sup>14</sup> Səsən tə pedənda ndən kyadangga ndarha kəm dəf Faara miighən a nafiyyighən, ndən kyadangga ndaarha kəm na Faara a fərang al-teena fingya tsauka yighən. Taama fal mamnggitghən nəm.

### *Hwan Mbulus Faara ka nafiya Afisa*

<sup>15</sup> Nanən kee, sək ni labar fərkəkafekkid nun fər nun a Chinəm Yeeso, tə kəm nggəm ndənun a nafiya Faara na chahal,

<sup>16</sup> malanggwi usa Faara ka kun wa. Ni naarha hwan Faara ka kun kətsar,

<sup>17</sup> hwan Faara ni Faara yi Chinəm Yeeso Kərəsti, tə Chindi na manggən, fərang Səsəna nən kun yi thladwayirha tə sənda tənun chik sənggən ngga.

<sup>18</sup> Niya hwan Faara a inanggən hur nun də na kukwaryidghən nun, tənun sən təmani shi-iten dī aah nən kun ka kamanggən, tə kəm sən hangnda mamnggit parkayidghən dəf nən mi-ighən a nafiyighən na chahal.

<sup>19</sup> Niya nggər hwanda kəm tənun sən mamnggit səsəmdəghən kalgha mbərha mu, na a əna taara ahur nəm, kəm fərgħa kəkafek. Səsəmdədi na əna taara ahur nəm, nəghən tal tə mamnggit səsəmdədi.

<sup>20</sup> Ndən ənagħa taara ahu Kərəsti a sayiddi thleng nanda sə hu mərta, tə kəmda fərang də tsənggam tsaurha a yisəmadghən a talara.

<sup>21</sup> A mbəda ni na Kərəsti a əna kutəyirha sə aten kutərya heu tə səsəmda, nduwa tə shembe tə kutəyirha. Nəghən tə thləma kalgha thləma mu heu na nda a fəra, mbə hu kəshiidđi kee ya wa, ta hu kəshirha də na bayi

<sup>22</sup> Faara dəfang də komani a kamu sar Kərəsti, tsau də teena yi kutəryid əngya heu, ka a thlar Kən hwan Faara nən\*

<sup>23</sup> na fadghən, nəghən lələgdə hu Kərəsti, kəla nanən tə altənggən lədfang nən əngya heu.†

## 2

### *Thliirha sə hu mərə ahu yibrha də tə Kərəsti*

<sup>1</sup> Kətəm nuwun məməra hu səsəna, kəsər ka kar mii nun fa tə dīmiyirha.

\* **1:22 1:22** Dzabura 8:7 † **1:23 1:23** Kolosiyaya 1:18

<sup>2</sup> Takkwa dun kwaman kəshidfiya əna taara nun tə 'ya na mid ənkaheerha. Ndəghən ni na a əna kutəyirha hu kəshiiirha, tə kəm na Səsənggən tə səsəmnda fa aten kowunni mbuwa əna taara tə 'ya na mid Faara.

<sup>3</sup> Kəm heu nəghəm kee kətəm, kəm a takkwa 'ya na mid thlu fad nəm, nəghəm a takkwa 'ya na mid fad nəm tə numad nəm kee, hu kiya kəsər ka ən ənad thlu farha, kəm kaar bəd səbrha hur Faara a tennəm bə kəla nanən aten fingya wangya kəshidfiya.

<sup>4</sup> Amma na niifa hadang Faara fa kaan, tə kəm nggəməndəghən a kəm muldahai,

<sup>5</sup> ko nanəm məməra ka dimiyid nəm, fərang yibrha nən kəm sə heu tə Kərəsti. (Kəsər ka nggayid Faara ni hərgəhang nanda kun.)

<sup>6</sup> Thlenggən kəm sə tə Kərəsti Yeeso, fərang mbəd tsaurha na kəm a talara təghən.

<sup>7</sup> Ənana Faara əndiya kəsər ka kəshiiirha na bəyi a kyad nggayid ghənən mbuwa nəm mbang sakhkən, nadə kəmhai tə nggayid di keeghən kyadang nən kəm hu Yeeso Kərəsti.

<sup>8</sup> Kəsər ka nggayid Faara ni wal nun həəkrha hu fərkəkafek. Yandiya mbə ka 'ya əna nun yi alten nun ni wa, fərra Faara ni

<sup>9</sup> mbə ka əna taara wa, nadə niifa taala.

<sup>10</sup> Kəsər kəm karid tar Faara ni, ənanən hu Yeeso Kərəsti tənəm əna taara na ngga, 'wanən fərang kəm ka kətəm a ənam.

### *Tama tsawum tal tə Yeeso Kərəsti*

<sup>11</sup> Tsaunən kee, dalama teena hai tə tsawud nən kətəm kun mbuwa Yahudaya ni nggətgha kun aah nanda, "nafiya thleewa muwa" a mii fingya

aagha fad ndan, “nafiya thleegha muwa” (kulo hai mbiya thlee mu diya, yi thlu farha ni kee na nda anaarha tē haara.)

<sup>12</sup> Dalama teena hai a sayiddi nanun ndəndəgha hai tē Yeeso, rongya ni kun mbuwun ahur nafini wurna Faara wa. Mbuwun ahur dəf miidi wa, tsawud nun hu kəshiddiya mbuwun tē shiteena tē kəm mbuwun tē Faara wa.

<sup>13</sup> Amma nanənya nuwun hu Kərəsti Yeeso, kun kətəm nuwun inggun tē Faara, amma nanənya bənda bə tē kun tsau tē ndəghən fa ahu far Kərəsti.

<sup>14</sup> Kəsər kərəsti tafadghən bəng də tsawud dədəmnggirha kəm bə. Wumang nən Yahudaya tē fingya mbuwa Yahudaya tsawa nda nafiya tal, hu farghən irang nən də aten kadiirha, changgən kalman dā hai ndəghangga kanda hai tsawangga kanda təsaryi.

<sup>15</sup> Malanggən əna taara tē ngyakhkya Musa wumanggən Yahudaya tē fingya mbuwa Yahudaya tsawa nda nafiya tal. Ənanən ndən kee ka a tsawum hu dədəmnggirha.

<sup>16</sup> Ənanən kee kəm ka a tangsanggən pathlang ndan kyab tē Faara. A tsawa nda farha tal hu mərəghən a ten kadiirha. Ndəghang də kanda hai tē tsawud təsaryiddi nana nda sə kətəm.

<sup>17</sup> Bə dāba tē pərang Labara kun na mbənggən yi tsawud dədəmnggirha, a kun mbuwa Yahudaya na inggun tē Faara, tē Yahudaya kəm na tsau tē Faara fa.

<sup>18</sup> Kəsər ka Kərəsti ni kəm kyab nəm mbang dərha thləmad Pəpa də hu Səsəna tal.

*Kən Faara yi Chinəm*

19 Nanən kee, kun mbuwa Yahudaya, mbə rongya ni kun balwa, kun nafiya ni na tə altendan heu tə nafiya Faara na chahal. Kun wangya wuraya na yi Faara.

20 Kun heu nuwun kəla kəna tənna nda aten mbukhrha kəna hai ənana fathlengya Yeeso tə annabiya, Yeeso Kərəsti tafadghən ndəna fer sar təndədi.

21 A hurghən ni Wumna təndədi heu tsəgha sə tsauka Kən Faara chahal yi Chinəm.

22 A hurghən ni kəm tənna nda kun heu ka a tsawun a mbərha na Faara sə tə tsaurha tə Səsənggən.

### 3

#### *Pər Mbulus Labar Faara a nafiya mbuwa Yahudaya*

1 Tsaunən kee, nggi Mbulus wan porsəna ka Kərəsti Yeeso ka kun mbuwa Yahudaya.

2 Səndisə səkdun labara aten nggayid Faara fəree nən tar diya ka a thlar kun ni,

3 kəla 'wani chireethleng 'ya hai kədəna Faara ənwulteena ənənən.

4 A karatang dūn əndi chireethleng ni hai, nun a walang 'ya sənni aten Kərəsti.

5 Amma kaar əndi na bəbee ya pərangwandan fiya wa, kəla pərang na Səsəna tə Pedənda fathlengya Faara tə annabiya na chahal,

6 ndəna, pər labaara na Mbənggən yi Yeeso Kərəsti, fingya mbuwa Yahudaya tsau nda fa har langaarha kəla kəm Yahudaya. Kəm tə kanda tsau dəm thlu farha tal. Kanda kəm na nda wal yindan kənaghən ahu dəfmi Faara a kəm hu Yeeso Kərəsti.

<sup>7</sup> Tsawed nda fa tēta a əna tar pər labarda ni na mbənggən hu fərta nggayid Faara tē səsəməndəghən na a əna taara ahur na.

<sup>8</sup> Ko nanən nggini ngguchit ahur nafiya Faara na chahal, nggini fəree nanda nggayid diya ka a pər labar dani ahur nafiya mbuwa Yahudaya aten Kərəsti mbuwa nəm mbang kirasang nda kənaghən.

<sup>9</sup> Wurna nda nggi ka thləghang nggəni fiya heu kwaman di na bəbee bəbeng na Faara ka kətəm, ənagha əngya heu.

<sup>10</sup> Na midghən sə nanənya nafiya na hu Kən hwan Faara, a pər sənda Faara nda dədəməndədəməndə a kutərya tē səsəmənda ha a talara.

<sup>11</sup> Ənda na midghən Faara ya ka kətəm, ləđang də 'ya na midghən hu Yeeso Kərəsti Chinəm.

<sup>12</sup> Kəsər ka fərkəkafekkid nəm a ndəghən, nanənya ndənəm mbang dərha thləmad Faara də kula hərəenga.

<sup>13</sup> Nanən kee, niya hwan kun, a mər fad nun hai ka səsaddi niya səsərha fa ka kun ya wa, səsaddiya kəsər ka a manangganda kun.

### *Hwan Faara ka nafiya Afisa*

<sup>14</sup> Kəsər ka kee niyi a bəra hai tē wadəd na a mbed Chindi,

<sup>15</sup> ahurghən ni na fa wurayighən heu na a talara tē hweede a wal ka thləm ndan sə.

<sup>16</sup> Niyi a hwanggən a fərang mamnggit kənaghənən kun tənən fərang shembe nən tsawun tē səsəmənda Səsənggən a hur nun,

<sup>17</sup> tənə Kərəsti tsaurha ahur nun hu fərkəkafek. Niya hwan Faara a non kanglang, kəmda non a tsərha hu nggəm ndan



<sup>18</sup> tənun wal səsəmənda sənang nda hai, kun tə fīngya na chahal heu, tənun sən hangnda nggəmənda Kərəsti, ndəna kəthləng ndəghən tə nzanggidghən, tə kudimnggidghən.

<sup>19</sup> Tə kəm a sən nggəmənda Kərəsti nun, ko nanən mbəm sənang hai heu wa, ləgdun ngga tə sənda Faara.

<sup>20</sup> Mamnggirha heu yi Faara ni, na səsəməndəghən a əna taara ahur nəm, heu tə əngya mbangwa nəm hwanda, nduwa numawa nəm.

<sup>21</sup> A tsauka mamnggirha tə Faara ahu Kən hwan Faara tə kəməda Yeeso Kərəsti pakwandə! Atsaukake.

## 4

### *Tsaurha tal tə ndan hu Kərəsti*

<sup>1</sup> Tsaunən kee, kəla nani hu porsəna kəsər ka Chinəm, niya hwan kun tsawama tə ndan hu kwamana aah na nda kun kamanggən.

<sup>2</sup> Kətsar tsawama məsələmənda nafiya tə sammayirha, tə kərəsta. Munyaama tə ndan hu nggəmənda.

<sup>3</sup> Ndeeman yid nun laf wumten da nun ha kyanun fərang na Səsəna kun, ahu dədemnggidfi wumangga kun heu.

<sup>4</sup> Thlu farha tətəl ni, Səsəna tə Pədənda kəm tətəl ni, kəla na shiteena aah nanda kun kamanggən tətəl ni,

<sup>5</sup> na Chinəm tal, fərkəkafek kəm tətəl ni, tə mbaptisma tətəl.

<sup>6</sup> Faara tal Chin kowunni heu, na aten əngya heu, ahu heu kəməda.

<sup>7</sup> Amma fərang Kərəsti nggayirha kowunni ahur nəm.

<sup>8</sup> Kəla ndana labar Faara,  
 “A sayiddi tər nən talara sə  
     har də porsəngya haadə,  
     Fərang də ən ənaarha fiya dədəmən-  
     dədamən.”\*

<sup>9</sup> (Mani ndarha “tərdə talara sə”? Nəghən a kyad ndaarha tərda hai ta kamu chehweerha də.

<sup>10</sup> Niifdi tərgha hai, ndəghənni kəm tərgha talakh talara sə, ka a ləgdənggən talara tə hweedə heu.)

<sup>11</sup> Ndəghənni kəm fərangga fīngya fathləngya Yeeso, fīngya annabiya, fīngya fa pər Labara na Mbənggən, fīngya pastoya tə famaləmgya,

<sup>12</sup> ka a ngwanggən nafiya Faara fa na chahal ənang taara nda yi tənang nda fad Kərəsti,

<sup>13</sup> Nən a dərha mbeedə kee kəl a səl wumten nəm hu fərkəkafek tə sən Wan Faara tsawum lələgda tsəkka yi Kərəsti.

<sup>14</sup> Tərgha mbəm a nggər tsaurha kəla wundakhnaya wa, nduwa tsawum kəla fīngya na nanda tsang teena kanda tə tur tsaharhaha na a kyakhrang huden ndan hai, nafiya na ndəndəl kanda a nggaba kanda tə huk kanda tə 'ya əna nanda.

<sup>15</sup> Ameyedghən, a pər kəkafek nəm hu nggəmnda, manəm sə heu ahurghən ndəghənggi na teena, ndəna Kərəsti.

<sup>16</sup> Kəsər ndəghənni wumangga mbəd njiya farha heu chik tsərha nda kala mbəd njirha əna tərghən nda hu nggəmnda.

---

\* **4:8 4:8** Dzabura 68:18

*Weerinda yibrha hu Kæræsti*

<sup>17</sup> Niya ndang nda kun, niya nggær ndang nda kun hu thlëm Chinëm, tæ ndaarha a nggær ðun tsaurha kæla nafiya mbuwa Yahudaya wa, mbuwana numad ndan mæmæl

<sup>18</sup> huten ndan lælgða tæ wula. Ndæghang nda kanda hai tæ yibrha na Faara a færa, kæsær ka yamid sændændan, tæ hur ndan na kakrak.

<sup>19</sup> Mbæ shilee sæ a yid ndan wa fær nda fad ndan ka tar kulafayirha, na nda sunad kala æn tsanda.

<sup>20</sup> Mbæ kee tsaha nun aten Kæræsti wa.

<sup>21</sup> Sændisæ pærang nda labara kun atenggæn tsau næn nafiyighæn ni kun, tsahang nda kun ha aten kækafek na ahu Yeeso.

<sup>22</sup> Nanæn kee, malaman ðimiyid nun tæ æn ænad nun yi kaar, æn ænaarha na sæbang kun dæ kæsær ka nggæm ængya mbuwa ngga.

<sup>23</sup> Ngwa kyakhrangga sæsæna numad nun hai.

<sup>24</sup> Tærama weerænda tsaurha ænana Faara na kæla altenggæn, yi nggayirha, tæ tsaurha yi kækafek chahal.

<sup>25</sup> Tsaunæn kee, malaman nggabaarha, kowunni nagha a thlæghang kækafek næn tuladghæn, kæsær këm ni ndan heu.

<sup>26</sup> A sæb hur nun dæ, a nggæmdun fa kyangga sæbrha hura kun hu ðimiyirha hai wa, tæ këm a nggæm ðun fa hæmnga yanfaara hai hur nun sæsæba dæ wa.

<sup>27</sup> Amma a malang ðun kwamana Sheetan wa.

<sup>28</sup> Niifa na a ngaara a nggærdæ ngaara wa. Ameyedghæn æna taara næn yi kækafek tæ harghæn, tænæn wal 'ya ha a færanggæn fa yamiya.

<sup>29</sup> A kyad labara bæ mbuwa mbænggæn a mii nun

wa, kəl tur labara na mbənggən na fər kaali yi taksarha tē ndan, hu ənaarha kiya nən dāng nda nafina sə na a səkkən.

<sup>30</sup> Kwarama nun də səbāng hur Səsəna Tə Pedənda də yi Faara na tē yibrha. Dalama teena hai a tsauka Səsəndi shedawa aten nun na a kyad ndarha a fara səmən nun a wal alten nun hu dīmiyirha.

<sup>31</sup> Ndəghama hai tē tur labara na i'ikh, tē hufirha hura, tē səbrha hura tē yanda, tē 'yar farha tē səb thləma tē kala tur yanggi kaara.

<sup>32</sup> Ənaman nggayirha ndan, non a hadang ndan fa, non a chahang dīmiyirha ndan də kəla chahang na Faara dīmiyid nun kun də hu Kərəsti.

## 5

### *Tsaurhahu kukwaryirha*

<sup>1</sup> Tsaunən kun wangya Faara ni nggəm nən, tsahama tsaurha kəla ndəghən,

<sup>2</sup> tē kəm tsawama yi nggəm ndan, kəla nggəmna Kərəsti kəm, fər nən fadghən ka kəm, sataka na sədghən mbənggən, sataka yi Faara.

<sup>3</sup> Amma ahur nun a sək nda ko labar kulafayirha wa, ko tur yanggini, nduwa nagha suna sə ahur nun wa, kəsər kamngwa tē nafiya Faara na chahal wa.

<sup>4</sup> Nəghən kee tē labara na mbuduhul tē palthya yi nuryirha nduwa na i'ikh kamngwa tē kun wa. Ameyedghən nama narha usa Faara.

<sup>5</sup> A sənunsə tē ndaarha, niifa na a əna pateyirha nduwa susuwayirha, nduwa suna, tsau də tal tē takkwa dāharha, mba nda wal langaarha hu kutəryid Kərəsti tē yi Faara wa ko ngguchit.

<sup>6</sup> A nggaba niifa kun tə labarya mere wa. Kəsər tur ənggini ya ndəna səbang hur Faara də aten nafiya ənawa taara tə 'ya ndanən.

<sup>7</sup> Tsaunən kee a wumdun teena tə kanda wa.

<sup>8</sup> Kəsər kun kaar nuwun hu wula, amma nanənya, wal dūn kukwaryirha a fad Chinəm. Nanən kee, tsawama nafiya na hu kukwaryirha,

<sup>9</sup> Kəsər kukwaryirha na ahur nun ndəna bang 'ya ba na ngga, tə tsawud nggayirha tə kəkafek.

<sup>10</sup> Tsahama əngya na a mbənannggən Chinəm.

<sup>11</sup> Ndəghama hai tə ən wula mbuwa ngga, a meyedghən pəramadghən.

<sup>12</sup> Kəsər ən shilee ni a pər ənggina nəm na nda a ənaarha bəbee.

<sup>13</sup> A ba ənggini a mbəd kukwaryirha ba, kowunni nən naghən.

<sup>14</sup> Kəsər kukwaryirha ndən kyangga 'ya pəpal ba. Ndəghənni nda nanda,

“Mekhnu sa na a shiirha!

Thliu sə hu mərta!

Na Kərəsti a fəro kukwaryirha.”

<sup>15</sup> Nanən kee, kwarama tə tsawud nun. A tsaudun kəla nurya wa, amma tsawama kəla nafiya na ndəndəl.

<sup>16</sup> Ənama taara tə kwamana wal nun yi nggayirha, kəsər bənggini nanəm sə yi mbəlfəerha.

<sup>17</sup> Tsaunən kee a nadun nurya wa, kəl sən 'ya nun na mid Chinəm.

<sup>18</sup> A nggal dūn tə aam inabi wa, yandı na dāng kun hu ən shilee də wa. Ameyedghən ləgdəama tə Səsəna tə Pədənda,

<sup>19</sup> kalaman ndan sə tə labarya yi Dzabura, tə amshiya yi faala, tə amshiya yi səsəna. Aama amshe a Chinəm tə hur nun heu.

<sup>20</sup> Kətsar nama narha usa Faara China ənagha əngya heu, ahu thləm Chinəm Yeeso Kərəsti.

*Tsawud nishya tə həshya hu kakhrha*

<sup>21</sup> Fəraman altennun ndan hu Kərəsti.

<sup>22</sup> Nishya na tə kakhrha teena fəraman fannun a chimayinun kəla nun ənanggən Chinəm.

<sup>23</sup> Kəsər chimarha ndəghən ni aten nukkun, kəla na Kərəsti aten Kən hwan Faara, Ndəghənggi tafadghən ndəghənni tə hərəkrha faddi.

<sup>24</sup> Kəla fərna fatakkwaya alten ndan a Kərəsti, nishya kəm fərama alten nun a chimayi nun ko hu mani.

<sup>25</sup> Kun həshya nggəmama nishyinun kəla nggəmna Kərəsti fatakkwayighən har fər nən yibədghən ka kanda

<sup>26</sup> ka a nagha chahal, tsabanggən də tə aama tə səsəmnda labarghən.

<sup>27</sup> Əna nən kee fər nən altenggən a walgha fatakkwaya mamnggirha na chahal kula ən 'yaara fa nduwa ən tsanda nduwa 'ya dīmi.

<sup>28</sup> Nəghən kee kamdə, həshya a nggəm nishyindan nda kəla nggəm nanda fad ndan. Kəsər kala niifa nggəmngga nukkun, nggəm nən altenggən.

<sup>29</sup> Mbə niifa sə 'wagha kar fadghən wa, amma nən narha həbang nda kəlaghən nən ha ngga, kəla na Kərəsti laf fatakkwayighən,

<sup>30</sup> kəsər kəm ndan ni hu fadghən.

<sup>31</sup> Kəla ndana Deleewar Faara,

“Na niifa mal man tə chin,

Thlæthlæbænggæn nukkun fa,  
kanda kyab tsawanda thlu farha tətal.”

<sup>32</sup> Ən diya nəghən bəbee kudimnggæn kaan,  
amma niyi a ndaarha Kərəsti ni tə fatakkwaya.

<sup>33</sup> Nanən kee, kala həshnefa tətani a nggəm  
nukkun nən kəla nggəm nən altenggæn, kala  
nuneefa kəm tətə ni a fərang mamnggirha nən  
chimadghən.

## 6

### *Tsawud wundakhnaya tə fa nggətyindan*

<sup>1</sup> Kun wundakhnaya, təraman shilee fa  
nggətyinun teena kəsər kun yi Chinəm ni, kəsər  
ndəna məməl.

<sup>2</sup> Ngyakhrha yi tal əna nanda tə dəfmee  
ndəghən, “Tərang shilee nda muwa tə tsu teena,

<sup>3</sup> təna tsawud nun naarha ngga, tə kəm na yibəd  
nun a naarha dzang hu kəshiirha.”

<sup>4</sup> Kun chingya, a səbang dūn hur wangginun  
də wa; a meyedghən, kəraman kanda sə hu kwa-  
mana na ngga, tə kəm tsaha man labar Chinəm  
kanda ha.

### *Mafaya tə tuwurayindan*

<sup>5</sup> Kun mafaya, təraman shilee tuwurayinun  
teena na hu kəshiirha. Fəraman mamnggirha  
kanda, koma nun a ənaarha ənamadghən tə hura  
tətali, kəla nun a ənang Kərəsti.

<sup>6</sup> A fərang dūn mamnggirha kanda ka tərəm hu  
yirha tənən mbənanang fiya wa. Amma kəla mafaya  
yi Kərəsti, ənama 'ya na mid Faara tə hura tətali.

<sup>7</sup> Ənama taara tə hura tətali, kəla nun a ənang  
taara Chinəm ni, mbə fiya wa.

<sup>8</sup> A sənunsə, na Chinəm a fərang kənağhən kowunni ahur nəm kala 'ya əna nəm ngga, ko mafaya ni, nduwa nafiya na tə alten ndan.

<sup>9</sup> Kun tuwuraya, kunggi ma ənəman mafayinun kee. A nədun a tərmanğ kanda wa. A sənunsə kun kyab na tuwuri nun tal a talara, ndəğhənggi kəm mbə wura hasə wa.

### *Kəsəmnda Faara*

<sup>10</sup> A mii ngwaladghən tsawama tə shembe ahu Chinəm tə səsəmnda mamnggitghən.

<sup>11</sup> Ngwama fa tə kəsəmnda yanda yi Faara fərang nən kun, tənun mbang pa kəfarha tə Sheetan ana midghən huk kun.

<sup>12</sup> Kəsər mbəm a yanda yi thlu farha tə fara wa, amma tə səsən kəshiid mbəlfeyya mbuwa nəm naarha, tə kutərya tə fingya na tə tə səsəmnda ha, tə fingya na tə kutəryid kəshiid wula a har ndan.

<sup>13</sup> Tsaunən kee, kalaman kəsəmnda yanda heu yi Faara, tənun mbang isha a fardī mbuwa ngga na bayi. A kwasamaddi ngwalang nun yanda nun narha tə shembe isha kət.

<sup>14</sup> Ishama tə shembe, kəkəfek tsauka kəla ən kən munun, nggayid Faara na kəsəm ndəğhən laf kun nən,

<sup>15</sup> na a kyad ndaarha ngwa dūn fa ka a pər Labaara nun na Mbənggən kəla pa pakhma yi tsawud dədemnggirha.

<sup>16</sup> Ngwa tsauka fərkəkəfek kəsəm ndənun tənun mbang bəlang wad hafya hai na tə mbəlfeddi a charha bə.

<sup>17</sup> Tərama tətər tasau yi hərəkrha, tə kəm thlaukh kəlar Səsəna, ndəna labar Faara.



18 Hwanama Faara k̄ətsar t̄ə s̄əsəmnda S̄əsəna. Hwanama Faara aten əngya d̄ədamən-d̄ədamən. K̄əsər non a k̄əla alten nun ha ngga a sayiddi nun a hwanda aten fatakkwaya heu.

19 Nggi k̄əm Hwaneema Faara in, t̄əna Faara f̄əre 'ya kamngga a thl̄əyi, p̄ər Labarghən ni na Mbənggən yi ənwulteena a fiya kula h̄ərenga.

20 K̄əsər ka labardi na mbənggən ya ndən tsauni a meyed Yeeso, ko nani hu porsəna. Hwaneema Faara in t̄əni p̄ər labar Faara kamngga a əne.

### *Mii ngwala nda'ya*

21 Tikikus, wanmanəm nggəm nəm, na a əna taara hu kwamana na ngga a Chinəm, Nən a p̄ərang 'ya kun heu, tənun sən 'ya niya ənaarha t̄ə kwamandi niya ənaghən.

22 Thl̄ənni ndən thl̄əman nun d̄ə k̄əsər a sən 'ya nun nanan a hurghən, t̄ə k̄əm f̄ərang kaali kun nən.\*

23 Shayina, ngwa tsauka d̄ədemnggid Faara na chindi, t̄ə Chinəm Yeeso K̄ərəsti t̄ə nggəmnda t̄ə f̄ər̄k̄əkafek t̄ə kun.

24 Ngwa tsauka nggayid Faara aten kowunni nggəmngga Chinəm Yeeso K̄ərəsti t̄ə nggəmnda mbuwa tam ngwalarha. Atsaukake.

---

\* 6:22 6:22

**Hona Bible**  
**The New Testament in the Hwana language of**  
**Nigeria: Hona Bible**

copyright © 2023 The Seed Company in collaboration with Language Developers and Bible Translators Association

Language: Hona (Hwana)

Contributor: Language Developers and Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-18

---

PDF generated using Haiola and XeLaTeX on 26 Jul 2025 from source files dated 18 Jul 2025

d942b897-c376-5386-bfaf-e0ce21c59136